



序

於舉世數百年所莫爲之學爲之而其端至微至  
密其事至實不可以豪釐差不可以意匠營度而  
獨孜孜焉自少至老竭智慮以窮其術而非有所  
慕利於其間斯其志趣若逃空虛者之乎廣莫遊  
寥廓者極於青冥其視世之咕畢歌吟以弋瑣瑣  
之名者豈直蛙聲蚓竅而已哉宜無復有所置意  
今夫天地古今之所以爲天地古今者氣與數而  
已數肇於氣而卽以定氣故數也者古帝王以之



明天察地紀物蹟而覈事變三代之實學在是後  
浸失傳流海外爲西人得轉以蹠蹺乎中國可歎  
也余昔年入京師聞宣城梅先生精數學以安溪  
相國薦

聖祖仁皇帝召見蒙殊寵然未聞以詩鳴也今先  
生之孫御史大夫循齋先生以先生所著勿庵詩  
集見示屬余擇其尤以壽諸梓且命題其後余伏  
而讀之矍然起曰此固先生之餘事也何乃復進  
於古若爾耶昔之論詩者曰有詩人之詩有才人

之詩有學人之詩余謂才人以氣雄學人以材富  
詩人以韻格標勝然律以古之作詩者則皆無是  
也古之作詩者要唯言其所不得已與言其所自  
得而已非是二者詩不作可也若先生之詩則言  
其所自得矣唯其自得故絕無規撫之迹而自進  
於古其才氣格韻雖韓白無以加以是知善詩者  
不徒求之詩也蓋先生之學幾于道矣窺秘于圖  
書溯源于黃帝堯舜參稽于四時日月星辰極變  
于方圓高下斯其神之所凝心之所遊翛然于塵

新昌堂詩金 卷首 二  
垢之外居寂寞而玩高明適其趣者山水寫其樂者兄弟友朋以是而爲詩詩心聲也宜若幽谿邃壑之泉瀉之萬仞而上其清也若空其甘也若醴其奏也如金玉之鏘而挾之以天籟乎余讀先生詩集更念先生之治數學也不足以炫世世亦莫問告焉而莫喻者而當所與往來酬酢者猶有穆尼閣方素北方位白陳獻可章穎叔李安卿薛儀甫諸人同聲相應于千里之外斯亦奇矣何至今日而遂寂寂耶以是歎前賢之用心夙乎遠矣此

余讀先生之集而更爲之畢然耳時

乾隆歲次壬申三月婁東後學沈起元撰

原序

吾宛陵梅氏自聖俞先生以來世以詩名往敘述  
之衆矣最後得梅子定九詩定九有志於君子之  
道目之爲詩人則瞿然謝不敏余蓋心異之夫日  
月星辰天之文也山川艸木地之文也天官五行  
曆律度數則所以經緯天地而妙其推測者也吾  
處天地之間俯仰上下心迷目眩漫無闕度比於  
蟄蟲寒鳥徒自號曰文人詩人也亦奚益哉定九  
砥礪學行探本知類於象緯歷算之學殆由性成

數計心通能自制器以準象間取西洋之學發揮  
討論南中言西學者數家質疑送難皆歎遜以爲  
莫及嘗手列其所見曆學諸書凡數十種多人所  
未見猶欲廣搜秘本以資參互屬余網羅可謂好  
學深思者也昔房玄齡等重撰晉書天文曆律五  
行三志專屬李淳風爲能深明星曆故可觀采今  
國家方纂修明史使得定九參與其中修天文  
曆律諸志卽未知視淳風何若當有可觀惜乎其  
不獲與也平生旣罕徵逐中年早鰥遂不復娶日

夜枕籍詩書以自娛暢其溢而爲文振筆風發披  
藝則冠其曹又溢而爲詩清真靜遠稱心爲言無  
時人餽衎裘馬之習易傳有之君子以言有物而  
行有恆夫詩不足以盡定九而其詩已卓犖有出  
於人是可以知定九矣

康熙己未陽月中浣同里弟施閏章拜撰

原序

有本之學其積也不易專一以入之博涉以辨之  
持久以畜之然後羣美畢滙溢出而爲詩則其氣  
厚志完無體不備上足追配昔賢而下以度越餘  
子非猝然之効也淺夫執詩論詩講求縱極工曾  
不出聲律章句之外殆類刻楮搏沙用力多矣歸  
於糜散無所成而止不工者更何論焉余持此相  
天下詩誦其迂者不啻戟手而起余終不變其說  
意宇宙大矣必有足當之者果見之梅子定九定

九深於律歷著書至數十種四方稱之獨未有知其善詩者夫萬物本於天難測亦莫如天以天爲之宗則神明所相理數舉萃於一源他藝能均不勞而自致定九不以自足窮探廣索晝緝夜思劬古人一物不知以爲己責將經術經世靡不本躬修以驗諸行事而况於詩乎癸亥之春告余橐其橐入燕燕多詩人其引爲同調連日夕倡和尚未可知而明史脫橐有期矣天文五行志專家豈必能多一聞定九至有不薦之於朝使參預其事

成一代不刊盛典者乎恐從此定九得行其學不復能多作詩如在江南時矣余於觀天之道懵然無所窺徒取其詩序之以志推服之久若世之知定九不能先於余然必有重其學因重其詩者則其不迂余之論也有日矣

樵李弟曹 浴拜撰



原序

江以南家世稱詩庶幾人人有集宜莫先余梅氏  
矣余蚤孤趨庭無所承誨然少嘗致力於是長而  
行四方與學士大夫相劇切卽未敢謂有當於古  
人抑且囂囂然不肯苟同於俗下從叔定九嘗謂  
余曰通三才爲儒極子之才毋徒流連光景比切  
聲律已也顧余性簡脫於儒先之書未能覃精力  
索以通其意或授以陰陽算數初不甚了亦旋復  
失之定九博覽多通少善舉子文戊午鄉於南

3  
2

、应为

又P6

中得泰西曆象書盈尺窮日夜不舍旦日且入闈  
余篋而置諸它所則艷然曰余不卒業是書中怍  
怍若有所亡文於何有余笑而還之嘗言西法詳  
密實勝授時諸曆又自爲書以折衷其所未盡而  
手製測晷妙逾西器其冥悟類夙授也比多客遊  
則又時時爲詩大率意有所獨造而旁暢於文詞  
非塗澤以爲觀者如畚金長真臬憲寄青州薛儀  
甫送章穎叔還山陰諸作言之灑然余固無與於  
象數之學者讀其詩亦時窺其彷彿其他清真靜

遠稱心爲言施侍讀愚山嘗亟稱之而嘉禾曹侍  
郎推爲有本之學則以其神明內蘊詩固不足以  
盡之也先太中用詩學起家厥後名輩相承蔭映  
江左逮我先公懷文抱質而盛業未究余季父嘗  
欲裒爲家風集溯自有宋訖於明季頃從祖瞿山  
亦有事於梅氏詩畧蒐採畧備固以屬定九及余  
助成之逡巡謝未遑也嗚呼浮華競而實學衰定  
九疇昔之言固將刊華就實以刷文人之恥余寧  
不謂然然而家風未扇名德無聞庸非吾黨之責

乎因敘而及之述媿也

同學姪庚拜撰

目錄

卷首

序

目錄

卷一

己酉至戊午共詩七十八首

卷二

己未至乙丑共詩一百六首

卷三

丙寅至丙子 丁丑詩缺 共詩八十一首

卷四

戊寅至辛丑共詩一百三首

右續學堂詩鈔四卷先大父徵君公之所作也先徵君著述等身雅不欲以詩名世而生平所存已不下二千餘首沈光祿子大以為先生名德碩學千古傳人昔揚子雲猶以詞章為雕蟲篆刻晚年深悔其所為先生固不肯為詩人而讀先生之詩者亦宜異於詩人之詩也故集中所登非關至極而藻采雖工槩從姑舍夫然後讀斯集者千百世可以想見其為人也其曰續學堂蓋以我

聖祖仁皇帝有續學參微賜額云孫毅成敬識

續學堂詩鈔卷一

宛陵梅文鼎定九甫著 孫毅成循齋甫較梓

巳酉

雨坐宛津讀友人黃山贈行卷子感而有作  
陽坡山前山雨急陵陽山市漁舟入咫尺敬亭看  
未能爛醉狂吟思石室有客獨探黃海奇歸來示  
我贈行詩勝事仙才兩驚絕愁中使我開雙眉我  
聞軒轅有丹井到彼能無發深省大藥何當赤縣  
成步虛辭和天都頂

復學堂詩金 卷一  
二月二日吳雨若招同沈方鄴魯玉蔡玉及  
吳不移家耦長姪集飲街南草堂限仄律  
分得集字

斗室臨高城林嵐氣遙集耳無闐闐喧目有圖書  
給美酒乍開尊新詩遂盈什相逢同醉歌誰問修  
名立

考坑道中

高嶺易爲雲深谷易爲雨還金曾未成何以辟寒  
暑腐齒丁壯年况多行役苦引分庶怡情歷境忘

艱阻終當餌黃芽松喬以爲侶寓目周八荒飄飄  
樂輕舉胡爲狃故常棲遲眷儔伍

雪中家從叔瞿山過飲山居

青山閉戶孤居慣書卷時開逸興多覓句每於閒  
處得逢君何意雪中過寒花萬樹看圖畫濁酒盈  
尊起和歌泥滑只今愁去馬荒村莫惜醉顏酡

山門歌贈楚山人

山到清明春正好閉門門內生芳草楚山人忽逐  
春雲相邀重走山門道山門石室石崢嶸嶽崎洞

壑含幽靈酌酒酒盡興不盡披裘恍惚來瞿劓陟  
嶺穿巖掃邱墓過此誰能便歸去一步十步重回  
頭回頭失却峰頭路爲君歌莫徘徊處處青山雲  
一堆君如不厭着山屐石室岩堯盡日開

南崎湖人家寄宿

錯水田間路依山湖上村林嵐風過靜雞犬客來  
喧秋漲遙連漢春船曲到門武陵何處覓今信有

桃源

半山上人七十初度

半公說法心清淨山河大地毫端應揮毫落紙世  
爭傳已知光焰垂千年學者只求人日好逢迎意  
悴形枯稿不信疾徐甘苦分官止神行進於道吾  
觀公年今七十清癯瀟灑金仙質有時扶邛恣遊  
賞匡廬泰嶽曾孤往前日黃山風雪中瓢笠歸來  
野鶴同如公壽者相已空心空無著壽無窮桑田  
海嶽從遷變願公常住依鄉縣長在敬亭宛水間  
長爲山川駐好顏

同倪觀湖先生登栢枏山絕頂望仙人臺

峨峨方石臺千尺凌晨烟昔聞山中叟曾此逢飛  
僊碁局觀未終倏忽更歲年樵斤置叢條木皮合  
且堅崖樹旣摧朽無人能攀緣我來陟嶺半俯視  
茲臺顛再尋蛟路登所見唯青天瓊宮到非遠意  
欲乘風旋下界溺埃塵安能久遷延庶同五嶽遊  
免此情內牽雲車策風馬願言長執鞭

白雲山觀陳孚吉作畫

一名嵩山

白雲山頂扶邛道憶昔扶邛恣幽討人道嵩山似  
此奇果是登臨衆山小重來對汝心盤桓欲晴不

晴雲漫漫陳子長歌拂素楮筆峰掃蕩開晴嵐巖  
半青松幾千尺水閣幽人敞虛室我欲呼之同上  
最高臺下視浮雲弄白日

寄玉礎王六

有序

玉礎與余妻兄陳三孚吉交三十年無間  
兩人皆善畫一以平遠一以馬人物皆擅  
名一時居比鄰晨夕共也嗟乎孚吉先往  
不可復作我思玉礎何以爲懷感而寄此  
山城新霽增惆悵憶爾虛簷孤嘯時圖就玉驄應

衆賞經營彩筆與誰知郊原木落故如畫溪上雪  
消看更奇同坐同行人不見獨逢佳處共君悲

寄溪帶軒主人 三首

迴溪帶層薄結宇成高軒茂叔蓮敷池淵明柳近  
門涼飈溪上迴瀟灑遍邱樊灘鴻雙雙鳴振鷺亦  
翩翩中有岸幘人濯足臨潺湲長吟命柔翰烟光  
相吐吞修名在身後意適餘安論愛此眼中景庶  
幾永勿譖

筆陣賈深忌文彩生憂虞誰能結舌瘖淳樸憶古

初丹青有至理景物供馳驅春花與秋樹氣候歷  
已殊點染異朱素柯葉紛垂敷始知手腕間能與  
大化符始知立象意書契徒區區笑問老摩詰渾  
沌能余圖自當棄言語浩然觀太無

幽居不在深巖戶不在奇小築依周道宛然水中  
坻楮墨集朋好茗酒時追隨裸坐忘主賓醉醒無  
嫌疑但見青松陰曾無赤日威我亦掩蓬戶屏跡  
南山陲悠然在人境浩歌常自怡况偕素心友晨  
夕門外溪何時相過從臨風思依依



衆芳館和先季豹先生石刻韻

窈窕瞿礪室委蛇萬仞溪中有曠世士好古凌梁  
齊攬興留詩篇大雅絕羣蹊古調斷難續雲鳥春  
無姿華館依曾城烟光何紛披捫蘿得奇文清風  
欣紹衣一唱再三嘆嘆息日晷移榮名瓊樹華柯  
葉同其歸安能起高躅至道心偕棲

喜半公歸自新都東寄索畫

病起看山山勢好溪橋醉醒一題詩相思白嶽人  
歸處正是蒼崖雪霽時路轉層雲峰出沒冰澌古

澗石逶迤心閒好景供圖畫肯寄荒齋慰別離

夏涼卽事

多病畏蒸暑幽棲還閉門涼風集朋好樂事在邱

園

用元韻寄酬俞澗口先生先是倪觀湖先生

家瞿山耦長有丁山之約

林烟深處啟柴門遙憶丁山山下村青眼千秋憑  
蠹簡素心幾輩破苔痕論文明月當軒靜把酒飛  
花入座喧有約何當同著屐著書傾篋慰相存

題畫贈羅仲開 二首

坐吉山頭雪作堆  
虛窻驚見老梅開  
新枝古幹清如許  
已覺春風拂面來

一樹梅花一卷書  
幽人對此意何如  
偷閒獨自成  
玄草多少門前問  
字車

宿家仲宣齋中

幽棲何所羨雅意  
托邱園剪燭宵成賦  
含節日抱孫家聲  
奇字舊古道濁醪存  
不用孤居愜青山在  
葦門

戲題杖首雙龍 二首

濟勝有君無絕險  
羊腸鳥道一時平  
登臨快意休輕擲  
變化先愁風雨生

扶老賜鳩煩刻削  
靈株天性異凡容  
較書遮莫誇黎火  
杖首今看雙燭龍

寄懷不次兄金斗 二首

南山鬱崔嵬珍木生  
其幽盤根覆百畝  
叢柯直以修度谷有  
高枝遠揚離其儔  
華實輝中林文彩施  
別陬梁棟旣天性  
匠伯紛相投靈質念  
所生芳芬

翔故邱柔條托根下頗異蓬蒿流干霄徒有志勁  
挺誰見收清風惠好音一本意何周感茲媿扶植  
晚成庶爲謀

黃鵠初試羽瞻雲思八荒志意良在遠六翮苦未  
長翹首見中天逍遙鳴鳳凰饑餐日月華渴飲金  
玉漿朝發扶桑顛夕至崑山陽求友雙青鳥結交  
瑤池旁卑棲曾不忘顧盼生輝光天路浩無阻白  
雲亦有鄉何當豐羽毛萬里同翱翔

偶成

丈夫志翬舉三山猶借途况乃爭失得耳目徒區  
區所畏顏鬢改歲月日以徂鍊鉛苦無藉中夜起  
踟躕天道無適莫栽培意豈殊庶幾守初服永矢  
以勿渝

讀裘簡臣盆荷詩有作兼呈馬逸老

杪冬咨祈寒冰雪盈丈許大勝因大復亢害爲甚  
暑波竭泥遂塵澤國焚焦土魚枯金石流况乃禾  
與黍嬰娜官舍蓮托根誠得所高齋絕外闕驕陽  
詎能侮灌溉時復勤盆池藉安堵虛室生微風幽

續學堂詩金 卷一  
香作迴舞新葉自卷舒疎花共軒舉君子有餘閒  
悠然命毫楮對茲佳卉清唱和成至語誰言簿書  
劇獲此雲霞侶二氣豈無偏噓植真能補野人捧  
新詩歎息重仰俯願以濂溪心沛爲郇伯雨廣厦  
更千間蒼生庇寧宇

正月杪雨中喜姑溪唐祖延徐爾典過訪

細雨庭花發柴關晝不開十年違燕笑百里破蒿  
萊往事堪回首春風有放懷床頭新濁酒歎息共  
深栝

春仲上渡道中遲觀湖先生入山不至

林薄依道周晨露午未晞游目青峰端飄飄引我  
思側見負薪人入市行復歸籃輿期未來長望心  
躊躇

同道士登文脊

山水負奇嗜登陟饒勝情相將梯石磴盤曲歷遙  
岑山空絕飛鳥飢虎號深林窄徑瞰危崖苔滑足  
難任逡巡棄短杖連延仗葛藤興愜失險阻意堅  
遺死生賤子感高義微軀安足論

與汪雨公飲酒旌陽 二首

何用中山千日期  
酩然便是太平時  
門前風雨急  
無賴說與醉人  
渾未知

醉倒山城風雨驕  
山城內外生江湖  
與君却憶西  
溪後橋上相逢  
破寂寥

次韻和瞿山醉月樓看雪兼以索畫

霽雪曉山浮光輝  
併一樓百壺真不  
醉十日只應  
留寓目成佳句  
揮毫足臥游  
輞川逸興在不  
負此  
中幽

次韻和家瞿山素五天延閣看雪

百里弟昆聚登樓  
意念深飄飄遊遠  
目次第起狂  
吟萬井寒光眩  
羣山朔氣沉  
只愁風雪住  
好景過  
難尋

偶成

浪說仙源隔休疑  
至道深任情依  
日用觀物見天  
心和氣生微醉  
清風起獨吟  
浩然此時意  
大藥不  
須尋

題西溪圖贈汪元佐

續學堂詩金 卷一  
潺湲橋下西溪水橋上觀魚數其尾一葉中流巢  
父眠不羨垂綸洗雙耳壁張此圖聞潺湲門內門  
外清流湍寄語橋西溪上客爆栗烹茶仔細看

西溪酌汪雨公適洪天度至

君不見返照入山風露滋卮酒飲君君莫辭人生  
所難聚知己良夜淒清及此時君家山南我山北  
逢迎却憶鍾山側石城城邊佳氣濃入眼秋山看  
不得敝廬偃蹇各歸棲山市黃花增太息太息一  
杯復一杯西溪橋上幽人來幽人著書戶常閉班

荆茅店欣追陪自是吾儕多意氣豈有揚雄問奇  
字濁醪易盡談未深倏忽長庚向西墜溪山不厭  
再相尋來日相逢白雲寺

同阮次星洪天度陳孚吉汪雨公王禮北諸  
子訥如德生崇宗諸上人游白雲寺追和

蕭太府石刻韻 二首

蕭森秋色在林邱竟日招攜愜勝游紅樹漫須驚  
短鬢青山自可傲滄洲林開溪筏分行下地迴烟  
嵐一片浮極目車塵看不見武陵風物此中留

風埃原不到林邱况共良朋策杖游弔古墳高香  
火宅題詩秋滿蕙蘭洲寺尋曲磴山鐘寂茶煮清  
泉石乳浮莫以滄桑多感嘆君看斷碣只今留  
祠今廢爲墳故三句及之  
汪公

天度雨公招同孚吉禮北諸子雅集見示白

雲樓唱和詩仍用前韻奉酬

時二子贈余小石

心閒隨處是丹邱載酒山城續舊游騷客久知饒  
勝覽高吟重咏憶芳洲攜來怪石烟霞合看去危  
橋蟠竦浮良會年來真不易從判累日爲君留

題畫

秋氣淨纖埃縱目愁榛莽結廬山水間臺高不敢  
上愛此門前溪波平時獨往操檝寧未閒不作江  
湖想

題畫

縹緲三神山凌虛參斗牛伏靈巖上松歎息不可  
求仙人鍊丹室誰知委道周弱水深未深飛梁臥  
紫蚪試問往來人出戶能不由

又

縱有漁郎至山扉不用關浩淼自春水人在白雲間

又

崖石淨於鏡春風不長苔留與神仙扣雙鑲當自開

西津渡別汪雨公

我愛溪山起常早雲深失却行歌道獨坐蓬窻祇自吟伊人忽至開懷抱更酌西溪酒同上西溪橋日出溪上山一一看岩堯丈夫意青峰色咫尺

烟光遮不得閉門相與期千秋分手斯須休歎息  
庚戌至戊午

春過家楚山池上

動有經年別悠然百里思綠楊驚歲月清鏡媿鬢  
眉曳屐春山日挑燈夜雨時相看一回首雙淚欲  
如絲

柏枧山逢採藥者爲之作歌

雲中農父斲山稗稗熟含嘻稱世外不解有疾那  
問醫桂蘭枯死棄蕭艾良卉天生用有時長鑱方



續學堂詩金 卷一  
賈羅神奇雪霜榛莽自初古炎帝非逢誰更知世  
人愛甘不愛苦珍熬屬厭還相賈寧知醜毒變膏  
梁方書異類資攻補南北陰陽薰與猶入肆出肆  
憑雙眸此物微細功力鉅伸於知己隨所投吁嗟  
越人倉公不可作用汝殺人如刈藿孝子疇能讐  
俗工忍使桂蘭名被惡不才何似臨山櫟匠伯不  
顧全純樸

過訪家素朗讀書處

斜日苔階過虛堂散客襟慙勤尊酒意真率十年

心山色捲簾近書聲閉戶深但令幽興在無用歎  
知音

舟泊皖城遇雨 二首

皖口黃梅雨曾無半日晴維舟依港曲高臥聽江  
聲風定濤還怒潮迴岸欲平柁樓新燕子恠爾掠  
波輕

一卷時欹枕江天只獨吟船窻風雨意樽酒醉眠  
心棋局篙師共漁歌賈客音人爭楊子席顧影一  
開襟

重過皖江呈陳默公先生時方有事於皖志

二首

迎江江寺再維舟江雨江風事事幽勝地圖經歸  
太史野人高館識荊州如君琬琰千秋業顧我迂  
疎五月裘孔李非緣曾世講懷中漫刺敢先投  
芒屨何當倒屣迎慙勤握手慰平生元龍盡說高  
居穩孺子深慚下榻情點筆江波窻外動論文牛  
斗檻邊橫此時家學名山擅野客閒吟許細評

浮山大師哀辭

二首有小序  
卽方文忠

某晚學未獲侍浮公法席前年承自青原

致書徵象數之學時以草槩無副未敢馳

應又聞精舍方成將歸憩息私心竊喜奉

教有日也無何訃聞癸丑夏舟泊皖江望

君子之舊廬而亦不能至因作短章用伸

哀悼

太空無留雲逝水無停淵天地有始終况乃天地  
間誰云盛名累委順皆自然生死旣同條洞觀無  
始先吁嗟我浮公往來胡憾焉所歎哲人萎疇與

續學堂詩金 卷一  
傳無言教體見真一豈必逃枯禪遺書在天壤誦  
之增涕漣

大易含參兩靈秘開馬圖柯葉同本根昧者岐精  
粗維公學海宗涓流念狂愚惠然垂遠問下微微  
末書便欲溯大江面命鍼其疎塵累苦相牽歲月  
忽已徂負此雙目明不見當世儒臨風歌一言遠  
寄同生芻英爽發昭明鑒此忱區區

復東方位伯

方子精西學愚病西儒排古算數著方程

論謂雖利氏無以難故欲質之方子

象數豈絕學因人成古今創始良獨難踵事生其  
新測量變西儒已知無昔人便欲廢籌策三率歸  
同文寧知九數理灼灼二支分句股測體綫隱襍  
恃方程安得以比例盡遺古法精勿庵有病夫閒  
居發疑情展轉重思維忽似窺其根和較有實用  
正負非強名始信學者過沿古殊失真辟彼車與  
騎用之各有神篆籀夫豈拙弩啄日以親援筆注  
所見卷帙遂相仍念子學有宗何當細與論

續學堂詩金 卷一  
柏規山 二首

谷險紆成徑雲開近見山  
岩花春後好石蘚雨餘  
殷響蒼樵人斧烟生衲子關  
岱華紛馬跡誰勝此  
中間

巖犬吠深匿藤橋客過稀  
木皮蒙竹屋澗戶啟繩  
扉生計無營足山蔬不摘肥  
相逢問城郭祇似昔  
年非

癸丑冬喜不次兄旋里

溪干輕雨浥征衣有客籃輿江上歸  
經術自茲當

世用琴尊肯與故人違  
山邨春近梅花發巖戶寒  
深桂樹稀耆舊相看君努力  
家園風物已多非

陪不次兄謁祠墓 二首

從君無少長歡集意何如  
光耀知先澤趨蹌慰索  
居獻酬忘日夕枯朽藉吹噓  
祠宇松楸色春生寒  
雨餘

廿載長爲客能無邱壟悲  
迴溪會未改豐碣有餘  
思世德君能紹家聲起自茲  
慚余守鄉邑蓬矢用  
何時

拜九一公墓口號同天章爾止暨五弟

古木蟻爲室深箐鳥不過四朝存墓道一徑入煙  
蘿大後心何已承家事豈多相期爲不朽年往莫  
蹉跎

題畫 二首

木落寒江秋水靜危巖千尺絕纖埃停橈獨坐疎  
林外時有輕雲渡水來

閣起釣竿焚筆研夢魂無復向人間從教振海風  
濤壯野客扁舟意自閒

重過梧軒感作短歌贈徐爾哲昆季

湖上青山山下村水田漠漠垂楊深憶昨褰裳來

信宿主人道舊開清尊酒酣更酌湖月蕩觴政初  
行歌始放徐公羣從擅風流吾家阮籍亦豪宕

叔仙輔嗣清言一座傾 王非石先生痛飲不知天

在上十載重來客鬢改梧軒花樹依然在故人驚  
對念存亡歎息人琴淚同灑 時令伯惇甫先生暨  
非石仙林俱已化去

勸君且莫悲疇昔竹几蕉窻書卷積人生最樂弟  
昆賢况復家學承淵源竚看努力青霄立慰爾高

續學堂詩金 卷一  
堂華髮年

網籐阮夜雨

雷懸山雨急風定石泉鳴萬壑連爲瀑千峯撼欲  
平虛堂漁艇似短燭月華明恍忽乘槎去全移世  
內情

贈中伯弟 三首

逸足無遙途健翮豈近舉野馬培長風蟻封閑皂  
圍豈不樂宣遊歲月其吾與春風變鳴禽倏忽易  
寒暑所以古志人茶蓼甘自茹

茶蓼茹有時男兒生有爲燦燦荆山璧濯濯連城  
姿琅琅薦天廟輝輝光陸離豈不貴自然抱璞誰  
能知他山有礪石攻錯以爲期

攻錯美日新長貧安足訴懷寶而被褐聊以愜吾  
素炫服豈不榮速成豈不慕國工愛其璞執玉敬  
爾步南山有文豹七日隱朝霧

盤峰僧舍 四首

望處羣峰合登來積靄微凌虛懸曲磴鑿石想雙  
扉谷杳樹還閉山空僧獨歸林端忽雞犬野客興

遄飛

大地苦初熟春光宛在茲  
久居看自足未到說應  
疑茶熟剝園筍窻開俯  
藥籬潺湲鳴小閣竹規起  
涼颼

松石坐塵外臨風指顧豪  
層巒環翠壘遠水入雲  
高邨襍千畦麥河縈萬圃  
桃舟車連道路來往自  
滔滔

日觀波瀾駭峨眉烟霧重  
尋常虛夢寐眴眴愜情  
淙風過一天靜機忘太古  
逢何當遺世累朝夕此

扶邛

飲家卓公舍爲之作歌同聖占

萬事真堪付杯酒有酒從君傾  
百斗人生聚散風  
中柳少年昨日今衰朽雪夜良朋酒一卮相看共  
憶少年時嚴課高齋晨授几細語疎鐙宵對棋  
世態何由入懷抱置身共許青雲早那知流水逐年  
華蹉跎坐令朱顏槁多君意氣凌千秋汗漫曾爲  
萬里游詩成慷慨歌燕市意到跌宕看吳鉤吁嗟  
丈夫豈肯懷鄉井壯心幾載向人盡秋風不是爲

鱸魚五斗誰能易三徑大笑不如歸去來舉世何  
人真愛才昭王賓客空荒臺千金駿馬皆塵埃富  
貴於我何有哉

宿觀湖草堂讀賀武受集 二首

風雨近深夜壺觴初罷時開緘相歎息烈士有遺  
詩磊落江湖氣淋漓憑吊辭挑鐙重擊節慷慨見  
須眉

麟閣人安在滕王址僅存蒼涼身外事浩蕩手中  
尊未握乾坤極誰超今古藩生平爾牢落欲慰不

能言

送姜學在歸吳門

午橋雨過杜鵑啼歸客扁舟發宛溪下瀨薰風吹  
去棹到家綠樹徧長堤伯兄稚子經年別畫舸名  
園幾處題難忘敬亭山下路清秋遲爾共扶藜

汝舟弟城西書屋 二首

著屐尋春春雨後春城駘蕩柳絲長小樓曲巷無  
人到消得清尊盡日狂

相對銜杯忘日暮窻虛醉眼就攤書不知市上有



續學堂詩金 卷一  
何事得到青鐙一卷餘

欲曙

華鐙明滅雞長號東方欲曙須女高掩卷太息引  
大白人生百歲何其勞眼前萬事已如此千秋意  
氣原吾曹屈指自古幾英傑未遇旣遇皆蓬蒿君  
不見昨日飛來風裏絮今朝落盡溪干桃丈夫用  
志必有托身外失得隨所遭

曾孫鈞

校字

